

قلب عجوز

مش كل الشيب فى الوش بيان

عارفة اللي ملامحه بتتكلم

وتقول شيبان

أهون بكثير

من فرع بيان لساه أخضر

والحزن بيعصر فى الشريان

أغصانه بتكبر وبتكبر

لكن منظر

ساقياه الدنيا بحور أحزان

رغم الأوجاع

أنا أحسن حد بيان فرحان

أنا ضل بيتهامي في ضله
والشمس أساسا بتضله
ومش راضيه تبان
فمتخذ عكيش ألوان الطيف
أنا حد حياته ربيعها خريف
والمطرة بتنزل حواليا
وف كل مكان
وبتيجي لحدتي وتتغندر
ترفض تسقيني وتتكبر
عملتني جزيرة في وسط البحر
تشوفها تقولي عليها الله
سبحان من أبدع ها المنظر
من كتر المطرة أكيد مروى

من إمتى دموع العين تروي؟

ده انا جذري السابح جوة البحر

يبات عطشان

وعينيكي تشوف للورد نداه

يتبسم ثغرك م المنظر

من غير ما يقول

وف لحظة بيان وسط المشهد

الورد نداه كان بس دموع

صوت الدقات جواه موجه

والزهرة اللي بتطرح فيا

زهرة ياسمين

ما انا عيني ابيضت م الأحزان

كل القمصان

صايبها العجّازان
والبير اللي بقيت ساكن فيه
مكتوب لي عليه
انا فتنة وسحر
كذب وبهتان
وف لحظة اتبدل كفر الناس
بأشد إيمان
وما فيش م المارة واحد عابر
هيفكر يشرب من بييري
خليكي يا عمري بعيد أحسن
خلي عصايتك بره البير
ده حبال السحرا فى بييري كتير
وعصايتك مش قد حبالهم

لا هاتقدر تبطل أفعالهم

ولا تقدر تجمع حزن سنين

ف ازاي عايزاها تشق البير

مش هاطلع ولا هامسك فيها

ولا هاقدر اكون قوال تفاسير

ده أنا المصلوب اللي بينهش في دماغه الطير

ولا حتى قميصك هيغير

لون الياسمين

ف متتخدعش

من ريحة السحر

ده انا عمري حزين

والورد الصابح جوايا

صابغ عمري

وملامحي بترفص وتكاير
والضحكة ما بتفارق وشي
أقسم بالله ده كلام كداب
بس مصدق ضحكي وغشي
فبلاش بايديكي تدقي الباب
مش هاقدر أوهب لك عمري
وانا نبعي سراب
ولا ها قدر أغزل لك فرحة
من توب كداب
وحياة النبض اللي بيحلم
يحضن نبضك
وانا في التوهان
وحياة البحر اللي اتمنيته

ياخدني لحضنك
من غير ما اتهان
وحياة اللحظة اللي اتمنيها تدوم
وتدوم وافضل جنبك
لو بالبهتان
بزيادة عتاب
ده انا عمري الأصلي
ماهوش عمري
أنا عايش عمريين
فوق عمري
ساقييني عذاب
وانتي جميلة
ولساكي شباب

وورودك لسة هتفتح
أرجوكي سيبيني بلاش أسرح
معقولة أكون عاشق م الحور
وقت أما بتصحي وبتغني
الشعر بيبقي جداول نور
وانا بيني وبين حب "رابونزل"
قلعة و ١٠٠ سور
ومانيش اللص اللي هيطلع
للقلعة ل فوق
ياخد "بالطاصة" على دماغه
ويشوفك يعشق تفاصيلك
أول ما يفوق
أنا أصلا دايب ف ملامحك

بس جزيرتي بتتشرّب بور
فازاي هاسقيكي الحب كاسات
وازاي هاخذك فوق للنجمة
وانا أصلا ساكن ف الأموات
عمري ف لحظة ما هقبل إني
ترجع لي حياتي على إيديكي
تضحى بكل جدائل شعرك
علشان مسحور
أنا راضي بعمة حرمانى
مستسلم ليها أنا ومأسور
بس انتي تغني من تاني
وتخلي جدائك تبدر نور
وأكيد هتلاقى فى يوم

غيري

فارس أحلام

له قلب جسور

والضحكة بتطلع من قلبه

وبحضنك هو اللي يفوز

وسيبيني أضحك في سكوتي

أنا راضي بضمة طيف مهزوز

أنا واحد عمره في الثلاثين

لكن قلبي يا بنتي عجوز